

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-00933-2014
Broj akta: 01EH-001
Gračanica, 31. 03. 2014. godine

Z A P I S N I K
SA 17. SJEDNICE OPĆINSKOG VIJEĆA
GRAČANICA

Održane dana 27. 02. 2014. godine u sali za sjednice nove zgrade Općine Gračanica, sa početkom u 10.00 sati.

Sjednici je prisustvovalo svih 30 članova Općinskog vijeća Gračanica.

Sjednicu je zakazao i istom predsjedavao Edin Ibrišević, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća Gračanica sjednici su prisustvovali i: Općinski načelnik Nusret Helić, pomoćnik načelnika za odnose sa javnošću Azra Mustajbašić, općinski pravobranilac Jasminka Imširović, šefovi službi za upravu Senaida Šaković, Aida Hodžić, Zijad Dedić i Mustafa Bajić, direktorica JU Gimnazija "Dr. Mustafa Kamarić" Gračanica, Minka Kurtović, te predstavnici sredstava informisanja.

Safet Pjanić je iznio primjedbu na Zapisnik sa 16. sjednice Općinskog vijeća Gračanica, nakon čega je Zapisnik usvojen jednoglasno sa 30 glasova "ZA".

Sekretar Općinskog vijeća Zehra Mujačić je zamolila vijećnike da ubuduće prilikom kandidovanja pitanja i inicijativa to urade u pismenom obliku, što je u skladu sa odredbama Poslovnika o radu Općinskog vijeća, kako ne bi bilo grešaka.

Mirza Omerdić je iznio sljedeće:

"Izlazim ispred Kluba SDA sa jednom inicijativom koju ću pokušati obrazložiti. Svi smo, naime svjedoci nemilih događaja u prethodnom periodu. I SDA kao odgovorna stranka, mora i prije početka sjednice izraziti nezadovoljstvo ponovnim neuvrštanjem tačke dnevnog reda koja se odnosi na razmatranje primanja u javnom sektoru i nakon višemjesečnih inicijativa. Ponovno je dignitet Općinskog vijeća doveden u pitanje. Počinjemo sumnjati da nekome nije u cilju da se ta primanja daju na uvid. Zašto vijećnička većina na čelu sa predsjedavajućim nije insistirala na dostavljanju podataka o primanjima u JP-a? Paušali vijećnika su javna stvar, zašto to ne bi bila i primanja u javnom sektoru? SDA je po pitanju paušala zauzela stav da se isti trebaju, ne smanjiti, već ukinuti, ali je i stava da to neće donijeti uštede koje su dovoljne za transfere socijalno ugroženim kategorijama. Pokazala je to historija jer su paušali bili već smanjeni, pa se nije dobilo ništa, imali smo socijalne nemire. Prave uštede su u nedomaćinskom odnosu spram novca poreskih obveznika unutar javnog sektora i njihovim visokim primanjima. Ako direktor u javnom sektoru ima, mi još uvijek ne znamo da li ima, a neki mediji su objavili, plaću od 6.000, neki su se trebali samospaliti da bi ova vijećnička većina poduzela nešto po tom pitanju i provjerila te podatke. Da li je nekoga strah da bi se moglo pokazati da dvojica direktora u javnim preduzećima imaju primanja veća od primanja cijelog općinskog vijeća mjesečno? Gospodo, mi smo odgovorni spram građana, i nas građani s pravom prozivaju jer smo dopustili da nemamo uvid u operativno poslovanje javnog

sektora. To poslovanje je obavljeno tajnom i o tome ne znamo ništa. Da li je ikada iko od direktora u tim preduzećima napravio i dostavio ovom vijeću trogodišnji strateški plan, razvoj? Da li je ikada Vijeća a ima zakonsku obavezu izvršilo vrednovanje tih preduzeća? Mislili smo da će se danas raspravljati o boljem upravljanju sredstvima Općine. I SDA je pripremila analizu, strateški plan, operativni plan aktivnosti, set kratkoročnih budžetskih prilagođavanja, reviziju socijalnih budžetskih transfera sistematske prilagodbe kriznoj situaciji, participaciju javnih preduzeća u budžetske transfere, razgovor o investicijama i nakaradnim i nesinhronizovanim zakonskim rješenjima, upućivanje inicijativa za izmjene i dopune zakona. Nažalost, svega toga nemamo i predsjedavajući moram izraziti žaljenje što niste imali osjećaja za hitnost i stvarno rješavanje nagomilanih problema i omogućili ovu tačku dnevnog reda. Socijalni nemiri su uzrokovani zbog netransparentnog poslovanja, zbog korupcije, zbog nepostojanja informacija operativnog djelovanja javnih sektora. SDA je u tom smislu napravila strateški plan za preovladavanje krize. Očekivali smo od ove parlamentarne većina da danas imaju svoj nekakav plan, da mi ponudimo svoja rješenja kao konstruktivna opozicija. Da razgovaramo o tim stvarima i da dođemo do konkretnih rješenja kako bi mogli izaći pred javnost. Nažalost, ja sam kao čovjek razočaran ovakvim stavom. Prije svega zato što nas svrstavaju kao leglo nerada. Mene to lično vrijeđa i rastužuje. Utoliko ukoliko sam ja za ovog kratkog vijećničkog mandata radio neke poslove koji su vezani za upućivanje inicijativa za neke izmjene zakona da bi se odblokirale investicije. Općinska administracija, javna preduzeća su u interesu svih građana. Ukoliko je došlo i dolazilo do javašluka, nedomaćinskog odnosa prema novcu poreskih obveznika mi to moramo vidjeti. Mi imamo odgovornost da provjerimo te podatke i da stavimo tačku na njih. Svo nekakvo težište je na Općinskom vijeću. Međutim, nije problem u paušalima, ukinut ćemo ih. Da li će to riješiti sve socijalne probleme? Ja mislim da neće. Zato što imamo enormne nesimetričnosti u plaćama. Mislim na rukovodioce. S tim u vezi SDA traži vanrednu sjednicu koja će se održati u roku od sedam dana kako bi se dostavili podaci vezano za primanja u javnom sektoru, podaci o ostvarenim aktivnostima u javnim preduzećima, analiziralo stanje u istim i pozvali direktori javnih preduzeća na ovo vijeće.

Takođe tražim da se od sljedeće sjednice svaka sjednica Općinskog vijeća prenosi na Radio Gračanici uživo. Tehničke mogućnosti Radio Gračanice su sada dostatne jer su čini mi se prenosili nešto uživo.

Zamolio bih u ime Kluba vijećnika SDA pauzu od pet minuta kako bi se sastao Kolegij i donio zaključak po ovom pitanju.

Edin Ibrišević, predsjedavajući Općinskog vijeća Gračanica:

“Evo da istaknem da je zahtjev opravdan u smislu što nema tačke dnevnog reda onako kako je bilo u Programu rada Vijeće, ali moram da kažem da je Općinsko vijeće, odnosno Stručna služba na vrijeme uputila nadležnoj Službi zahtjev za pripremu ovog materijala. Ja sam u zadnjim danima sa šefom službe obavio razgovor, pokušavao da se dođe do tog materijala, kako bi bio razmatran na ovoj sjednici. Ne znam, evo neka šef Službe da dodatna pojašnjenja kad je ovo u pitanju.”

Općinski načelnik, Nusret Helić:

“Samo da kažem da smo mi poslali Informacije koju je razmatralo Vijeće na prošloj sjednici i zaključka da će se uputiti prema nadležnim javnim institucijama, ustanovama i preduzećima određeni dopis u kojem treba da nam dostave podatke. I tamo u jednom dijelu zaključka stoji da će se u tom smislu održati sastanak sa svim predsjednicima upravnih, odnosno nadzornih odbora, sa direktorima javnog sektora čiji je osnivač Općina. Takav sastanak smo mi održali prije dva dana i dogovoreno je da do sutra moraju dostaviti podatke o plaćama. Neki su umeđuvremenu dostavili, i to ne samo o plaćama nego i o svim drugim naknadama. Znamo koliki su paušali. Na osnovu toga i naših podataka koje mi imamo i koje ćemo i danas neke predočiti, da se napravi materijal. Ako se sjećate takav je zaključak bio i takav je sastanak i održan i mi sutra trebamo imati sve te podatke. S ovim što ćemo imati pripremit ćemo, a evo vi ćete se dogovoriti u pauzi kad će ta sjednica biti. Normalno je pozvat će se svi koji trebaju.”

Mirza Omerdić:

“Meni je jako drago što je održan taj sastanak, ali treba da ukažem na još jednu stvar. Evo predsjedavajući reče da je sve u zakonskom roku, ali ova inicijative od strane kolege Mirsada su bile prije nekoliko mjeseci. Je li nam treba šest mjeseci, je li treba da se desi socijalni bunt pa da mi počnemo razmišljati o tome kako i na koji način djelovati. Druga stvar, ja prošle godine nisam bio zadovoljan sa izvještajima javnih preduzeća. Sve sam ih pregledao i mogu dati svoje stručno mišljenje i dat ću ga. Znači, treba ukoliko Općinsko vijeće je prozivano za određene uštede, moramo imati puni uvid u operativno djelovanje. Ja neću da mene ljudi zaustavljaju na čaršiji i da misle da je sve u paušalu. Ja paušal ne primam, ja sam ga sebi zvanično ukinuo i nije nikakav problem i da mi sada izglasamo. Svejedno nema ništa od toga. Problemi su ozbiljni. Hoću da imam uvid, neću da me ljudi zaustavljaju i da kažu ti si lopov. Ne može tako. Neka se ne igraju, neka ozbiljno pristupe svom poslu. Neka nas ne tjeraju da tražimo od Poreske uprave, nadležnih inspektora da nam dostave te podatke. Ti podaci moraju svakako biti detaljniji u odnosu na ono što se predočava bilansom stanja, bilansom uspjeha. Ima potraživanja koja su preko godine dana 50.000,00, ostvarena dobit 20.000,00. Mislim nema smisla. Dakle, u tome je i poenta da, ukoliko i kada prikupimo ove podatke hitno trebamo održati sjednicu Vijeća kako bi to razmotrili.”

Predsjedavajući Vijeća Edin Ibrišević je napomenuo da je inicijativa Čamdžića kandidovana na Program rada Vijeća za 2014. godinu i to je uvrštena za februar i usvojeno je to jednoglasno, a nakon toga na inicijativu Kluba SDA data je pauza kako bi Kolegij Općinskog vijeća održao sastanak i zauzeo stav oko prijedloga. Po završetku pauze pridsjedavajući Vijeća Edin Ibrišević iznio je sljedeće:

“Evo nakon pauze na inicijativu Kluba vijećnika SDA, na kojoj je održan sastanak Kolegija Općinskog vijeća i zaključeno je da se vanredna sjednica Općinskog vijeća Gračanica na temu visine plata kao i smanjenja vijećničkog paušala i drugih naknada, održi 18. marta 2014. godine, utorak u 11.00 sati. Pored ove odluke Kolegija zamolio bih i članove Vijeća da se o ovome izjasne.”

Prijedlog je usvojen jednoglasno sa 30 glasova “ZA”.

Nastavljeno je sa kandidovanjem pitanja i inicijativa od strane članova Općinskog vijeća.

Mirsad Čamdžić:

“Ova diskusija kolege Omerdića kao i inicijativa koju smo upravo izglasali, ponukalo me ujedno i da povučem ono što sam pripremio, a to je zahtjev za proširenje dnevnog reda sa ovom tačkom jer sam i ja bio malo izrevoltiran ovim što Općinsko vijeće nije odregovalo na zaključke sa decembarske sjednice, kada sam predložio ovu tačku u Program. Znajući o čemu se radi napominjem samo da sam 03. 02. 2013. godine poslao još jedno pismo da se ne zaboravi ispoštovati ovaj zaključak, ali mislim da će biti vremena da se do 18. 03. to konačno pripremi, tako da ću ovaj zahtjev za proširenje dnevnog reda kojeg sam pripremio povući, a uputit ću jednu vijećničku inicijativu i to:

“Tražim hitno oglašavanje javnog poziva za stavku 614311-grant neprofitnim orga.budžet za mlade u iznosu 38.000 KM.

Obrazloženje: Objavljivanje javnog poziva se vrši na osnovu člana 3. Odluke o kriterijima, načinu i postupku raspodjele sredstava iz granta za projekte mladih koji se finansiraju i sufinansiraju sredstvima Budžeta Općine Gračanica (“Službeni glasnik Općine Gračanica”, broj: 9/10).

Navedeni član glasi: Tačka 2. Javni poziv na raspodjelu sredstava iz člana 1. ove odluke objavljuje se u sredstvima informisanja i na službenoj web stranici Općine Gračanica, najkasnije 45 dana od dana usvajanja Budžeta Općine Gračanica za tekuću godinu. Inače ova odluka je donešena na osnovu člana 14. Zakona o mladima Federacije Bosne i Hercegovine. Pošto je od usvajanja Budžeta prošlo više od 45 dana, nema nikakvog razloga da se ne oglasi javni poziv-grant neprofitnim organizacijama, budžet za mlade u iznosu od 38.000,00 KM. Hvala.”

Fadil Mešić:

“Udruženje taksista općine Gračanica traži da nadležna služba u Općini, a to je Služba za poduzetništvo, lokalni razvoj i finansije, čiji je šef Zijad Dedić, prilikom izdavanja rješenja budućim taksistima odredi i lokacije, znači mjesto gdje će taksista da dežura. Da se pogrešno ne razumije nisu taksisti protiv da se zaposli još ljudi, odnosno taksista, samo na rješenju treba da piše mjesto tj. lokacija. Dalje da se iznađe mogućnost da se odrede nove lokacije za taksi stajališta kao naprimjer Bolnica, zatim ispred Općine Gračanica, tako da građani koji trebaju prevoz imaju na usluzi taksi ispred ovih ustanova, dakle Bolnica i Općina. Ova nova ideja mislim da ne bi trebala biti problem, da u razgovoru Zijad Dedić sa ostalim nadležnim dođe do pozitivnog rješenja.”

Vehid Osmanović:

“Moja inicijativa je upućena Skupštini TK i budućoj Vladi TK, a inicijativa glasi: Pokrećem inicijativu da se pristupi izmjenama i dopunama Zakona o zdravstvenom osiguranju i drugih zakona koji regulišu ovu oblast kako bi svi građani imali pravo na zdravstvenu zaštitu bez ograničenja i bilo kakve diskriminacije.

Obrazloženje: Dosadašnjom primjenom postojećih propisa znatan broj građana neopravdano ne može koristiti zdravstvenu zaštitu niti ovjeriti zdravstvenu legitimaciju iako ne snose nikakvu krivicu. Naveo bih nekoliko drastičnih primjera.

1. Zaposleni radnici za koje poslodavci iz opravdanih ili neopravdanih razloga ne uplate doprinose za zdravstvo, ostaju bez mogućnosti zdravstvene zaštite i još se za to neopravdano na šalterima crvene i stide zbog neodgovornosti drugih.

2. Radnik koji odlazi u zaluzenu penziju da li po radnom stažu ili starosnoj dobi činom odjave u firmi u kojoj je radio gubi pravo na zdravstvenu zaštitu do dobijanja rješenja o penziji koje potraje i po nekoliko mjeseci.

3. Biroi za zapošljavanje su puni radnika ili članova njihovih porodica koji rade po inostranstvu, bave se privatnim djelatnostima ili na crno rade u FBiH, ključivo zbog zdravstvene zaštite se nalaze na Birou. Izmjenama ovog zakona po kojem bi svaki stanovnik imao pravo na zdravstvenu zaštitu, rasteretili bi se biro za zapošljavanje i izbjegle gužve kod ovjera zdravstvenih legitimacija koje bi bilo dovoljno ovjeriti jedanput godišnje.”

Ibrahim Hasić:

“Ja bih obnovio jedno vijećničko pitanje, ne bih ga čitao a odnosi se na Karate klub Gračanica. Dalje bih uputio jednu primjedbu predsjedavajućem na okolnosti prošle vanredne sjednice od 18. 02. 2014. godine, a odnosi se na dio zatvaranja sjednice. To govorim iz razloga što su gosti, mlada dama i gosp. Imširović se obraćali i mislim da je trebalo otvoriti raspravu po pitanju te dvije diskusije. Mislim da se zna ko može zadnji govoriti u ovom vijeću. Ne može govoriti ulica, treba neko da potvrdi ili demantuje te navode. Toliko.”

Senad Selimović:

“Imam dvije inicijative i upućujem ih Općinskom načelniku. Zamolio bih Općinskog načelnika i službe, da nam što prije pomognu ili prebace sredstva sa EK 821224, predviđena Budžetom Općine Gračanica za 2014. godinu, u pitanju je vodosnabdijevanje u MZ-i Trnovci. Gospodine načelnice, pomozite nam da što prije krenemo sa izgradnjom bazena za pitku vodu u naselju Šabići u MZ-i Trnovci. Već duže vremena vodosnabdijevanje u tom naselju je veoma, veoma kritično. Načelnice, takođe bih Vas zamolio, da krenemo sa izgradnjom društvenog doma u MZ-i Trnovci. Na EK 821231, sredstva su predviđena i Budžetom Općine Gračanica za 2014. godinu, u ukupnom iznosu od 10.000,00 KM. U nadi da ćete nam što prije pomoći, unaprijed Vam se zahvaljume i u svoje ime i u ime mještana Trnovci.”

Edin Ibrišević:

“Ja imam jednu inicijativu koju upućujem Kantonalnoj Skupštini, odnosno predsjedniku Kantonalne Skupštine gosp. Slađanu Iliću i to:

- Da na narednoj sjednici stavi tačku dnevnog reda kojom se usvajaju izmjene o proglašenju novih regionalnih puteva čime se rješava status puta Gračanica-Malešići-Lukavica. Proglašenjem

ovog puta regionalnom cestom drugog reda, ispunili bi se dugo očekivani zahtjevi građana o asfaltivanju ovog puta, čime bi se kvalitet života velikog broja građana popravio.”

Almedin Devedžić:

“Evo ja želim da se zahvalim predsjedavajućem Općinskog vijeća na inicijativi i nadam se da će se ovaj postupak ubrzati, kako bismo i mi u Lukavici napokon bili spojeni sa centrom općine Gračanica kvalitetnim putem.”

Prešlo se na raspravu o predloženom dnevnom redu 17. sjednice Općinskog vijeća Gračanica.

Za diskusiju se javio Hasan Puškar i iznio sljedeće:

“Je li se i ove godine ponavlja što se tiče Mješovite srednje škole, jer prošli puta zbog Plana upisa škole mi smo morali održati vanrednu sjednicu. Je li se to neko igra s nama, s nas trideset. Ako je obaveza da Plan upisa treba odobriti Općinsko vijeće i načelnik, smatram da je školski odbor bio dužan, nastavničko vijeće i direktor Mješovite srednje škole dostaviti nam Plan upisa. Prošle godine smo napravili to pa je bila vanredna, a evo ove godine vidim da se radi to isto. Kako znam da je rok za dostavljanje Plana 15. 03. 2014. godine, znači, hoće li se ponoviti prošla godina i da se dostavi dopis zašto nam Plan upisa nije dostavljen i da mi raspravljamo ovdje zajedno sa njima o tom planu. Ukoliko se ponovi prošla godina moja će inicijativa biti smjena tog školskog odbora i ostalih odgovornih lica za ovo, jer neće se niko više igrati s nas trideset ovdje. Ovdje piše načelnik ili Vijeće, a logično je da mi to radimo zajedno ovdje sa školom. Ovo je više krajnje neozbiljno jer znači da će sada neko dostaviti Plan upisa samoinicijativno bez naše odluke, što smatram da po zakonu nije uredu. Vidjeli ste i prošle godine šta je bilo, izbacuju se neke škole, elektrotehnička, mašinska škola. Šta će se ove godine izbaciti. Stoga bih molio da se dostavi upit šta je sa Planom upisa u Mješovitu srednju školu za 2014. godinu.”

Predsjedavajući je naglasio da će se uputiti dopis.

Za govornicu je ponovo izašao Puškar Hasan:

“Izvinjavam se, ali imam pitanje šefu Službe za upravu vezano za tačku 2. dnevnog reda današnje sjednice. Ovdje na materijalu piše Plan namjenskog utroška sredstava koja se ostvaruju korištenjem državnih šuma na općini Gračanica. Ovo je Plan, okrene se sljedeći list, mi sad donosimo odluku o planu i kad se okrene sljedeći list, je li iko vidi ovdje plan. Čitavo vrijeme piše plan, plan, a gdje je plan. Ja znam da su ta sredstva mizerna i da je to oko 1.000,00 KM suma, ali gdje je plan? Nije bitno gdje će se ovo potrošiti, ali bi bio red da nam se dostavi taj plan. Pričamo o planu, a nema plana. Isto kao da pričamo o budžetu Općine Gračanica, a budžet nije u prilogu. Moj je prijedlog da se ova tačka povuče s dnevnog reda, a da se pred nas dostavi taj plan bez obzira gdje će se ta sredstva utrošiti, a hoće li se on ostvariti ili ne to je sad nešto sasvim drugo. Realno bi bilo po meni da se dostavi taj plan tabelarno za nas trideset.”

Općinski načelnik je kao predlagач povukao tačku 2. sa dnevnog reda 17. sjednice Općinskog vijeća.

Predsjedavajući Općinskog vijeća je pročitao dnevni red koji glasi:

1. IZVJEŠTAJ O REALIZACIJI PROGRAMA RADA, OSTVARIVANJU POLITIKE OPĆINE I AKTIVNOSTIMA OPĆINSKOG NAČELNIKA ZA 2013. GODINU
Izvjestilac: Nusret Helić, Općinski načelnik
2. PRIJEDLOG PLANA UPISA UČENIKA U PRVI RAZRED GIMNAZIJE „DR. MUSTAFA KAMARIĆ“ GRAČANICA U ŠKOLSKOJ 2014/2015. GODINI
Izvjestilac: Minka Kurtović, direktorica Gimnazije
3. IZVJEŠTAJ O IZVRŠENIM PROCJENAMA PROMETA NEPOKRETNOSTI I PRAVA ZA 2013. GODINU
Izvjestilac: Razija Junuzović, predsjednik Komisije za procjenu

4. INFORMACIJA O STANJU ZAŠTITE OD POŽARA I VATROGASTVA, PRAĆENJU I IZVRŠENJU PLANA ZAŠTITE OD POŽARA NA PODRUČJU OPĆINE GRAČANICA U 2013. GODINI
Izvjestilac: Mustafa Bajić, šef Službe
5. INFORMACIJA O REALIZACIJI ODLUKE O STIPENDIRANJU UČENIKA I STUDENATA U ŠKOLSKOJ 2013/2014. GODINI
Izvjestilac: Senaida Šaković, šef Službe
6. NACRT ZAKONA O ZAŠTITI OD BUKE
7. ZAKLJUČAK IMOVINSKO-PRAVNE SLUŽBE
Izvjestilac: Aida Hodžić, šef Službe

TAČKA 1:

IZVJEŠTAJ O REALIZACIJI PROGRAMA RADA, OSTVARIVANJU POLITIKE OPĆINE I AKTIVNOSTIMA OPĆINSKOG NAČELNIKA ZA 2013. GODINU

Uvodno obrazloženje je dao Općinski načelnik, Nusret Helić:

„Izveštaj koji je pred vama je sažetak ili presjek onoga što smo radili prošle godine provodeći lokalnu politiku.

I to je dovoljno da pokaže da smo uspješna lokalna zajednica zahvaljujući zajedničkom radu i da možemo biti primjer drugima, posebno u racionalnoj organizaciji, odgovornom odnosu prema građanima i budžetskoj stabilnosti.

Kad sam rekao zajedničkom radu mislio sam i na Općinsko vijeće, bez čije podrške i odgovornog rada ne bi bila ni izvršna vlast uspješna. Oni koji prate rad i Općinskog vijeća i nas, prije svega mislim na međunarodne organizacije, civilni sektor, ambasade pojedinih zemalja i dr., daju takvu ocjenu.

Želim da dodam izvještaju podatak, trebali smo ga dodati možda i u materijalu, da u izvršnoj vlasti općine mislim i na sve četiri službe i kabinet i stručnu službu danas rade ili je zaposleno 115 uposlenika, od kojih su dva pripravnika koji se educiraju za matičare kao zamjena za penzionisane (takođe imamo dva uposlenika na određeno vrijeme).

Po službama to izgleda ovako:

1. Služba Vijeća četiri uposlenika (tu su i predsjedavajući i sekretar)
2. Služba za poduzetništvo, lokalni razvoj i finansije 19 uposlenika
3. Služba za prostorno uređenje, geodetske i imovinsko-pravne poslove 22 uposlenika
4. Služba za opću upravu i društvene djelatnosti 36 uposlenika
5. Služba za civilnu zaštitu sa vatrogascima 20 uposlenika
6. Pravobranilaštvo dva uposlenika
7. Općinski razvojni tim sa kabinetom i sportskom salom 12 uposlenika

To je ta racionalnost i kojoj sam govorio i možete li naći općinu naše veličine i broja stanovnika sa tako racionalnom upravom?

Mi pripremamo cjelovit pregled podataka o plaćama i dr. za javni sektor općine i on će biti brzo, ali da imate podatak da su u Općini osnovne plaće:

- Načelnik Općine 2.900 KM
- Predsjedavajući Općinskog vijeća 1.980 KM + paušal 400 KM
- Šefovi službi 1.600 KM
- Šefovi odsjeka 1.260 KM
- Državni službenik i savjetnik Načelnika 1.150 KM
- Namještenik više školske spreme 750 KM
- Namještenik srednje stručne spreme 600 KM

I ovo su podaci o racionalnom odnosu.

Ima nekih tehničkih i drugih grešaka, pa da ispravimo: u pregledu projekata općinskog razvojnog tima ponavlja se dva puta projekat REKONSTRUKCIJA ULICE ŠENIK, pa ga na strani 6 pod tačkom 22 treba brisati.

Na 7. Strani u naslovu stoji POLJOPRIVREDA I ZAŠTITA OKOLIŠA, dio naslova ZAŠTITA OKOLIŠA treba brisati, jer se samo govori o poljoprivredi.

Učesnici u diskusiji su:

Esad Tursunović:

„Jedno pitanje vezano za prostorno uređenje, odnosno ono što nas boli. Bit ću malo lokalizovan, npr. Stjepan Polje. Deset godina ništa ne rješava Općinski načelnik i administracija u Općini. Toliko imamo zamjenika, toliko imamo službi, a ne rade ništa. Nikad nisu izašli na teren da vide probleme, sigurno nisu. Stjepan Polje ima oko 2.000 neiskorištenog zemljišta, a niko nikad nije izašao. Stavili su nam zabranu gradnje ili nisu. Mi evo jedno određeno vrijeme pravimo sastanak privrednika Stjepan Polja. Firma „Trgovir“, koja zapošljava blizu sto radnika i koja na godišnjem nivou daje deset miliona poreza po prihodu i osnovu PDV-a, treba da otvori pogon. Ja ne vidim ljudi da se to ne može riješiti. Ne vidim. Poduzmite nešto. Kad se priča sve je po zakonu, otkud nam onda problemi. Toliko.“

Hasan Puškar:

„Klub vijenika SDA u potpunosti podržava Izvještaj o realizaciji Programa rada Općinskog načelnika.“

Općinski načelnik, Nusret Helić je odgovorio na diskusiju:

„Nije replika nego opravdano je negodovanje, ali ja maoram reći da smo mi, ako vam trebaju i pismeni tragovi, poduzeli sve što je do nas. I zadnji puta ste mogli vidjeti Prostorni plan Kantona je blokirao, ali dobili smo pismo poslije ovih dešavanja, juče ili prekjuče, u kojem stoji da će biti uvršteno na dnevni red i treba biti uvršteno u februarsku sjednicu, odnosno čim prije pokretanje postupka izmjena i dopuna Prostornog plana Kantona. I zadnji puta sam vas informisao, bili su kod mene komplet tim, bio je i premijer, sekretar i bila je osoba koja radi konkretno na predmetu. Tražili smo, ubjeđivali je mi da zakonito može donijeti odluku kad je „Trgovir“ u pitanju. Zarekao sam se da ću to riješiti po cijenu da ja odem, ali ću povući neke poteze upravo iz razloga zapošljavanja itd. Mi imamo Prostorni plan koji je usvojen i oni su poslije nas radili Prostorni plan Kantona i nekome je gore naumpalo da naš ne prihvati što je dovelo do ovih zavrzlama. Sve smo to rekli i jednom premijeru i drugom i to je sramota. Evo kakva je birokratija što se tiče viših nivoa vlasti. Ne branim ni ovo ovdje, ali osam godina mi na to ukazujemo zbog toga što bi se ljudi zapošljavali. I tad smo ubjeđivali i tu ženu i ministra da ima prostora, nudili smo neka rješenja koja

su zakonita. Ja sam rekao „Trgoviru“ s kojim komuniciram stalno jer je čovjek u pravu, i rekao sam i Službi da ću ja za par dana izdati mu odobrenje. Naplatit ćemo mu naknadu za pretvaranje poljoprivrednog zemljišta i staviti na račun. I po cijenu da se digne Kanton da mene smijeni, ima zakonskog osnova i izdat ćemo to rješenje, jer smo u pravu. Vi znate kad ne reaguje administracija na nešto, a ima prostora za to, kako se to odražava. Tako ćemo raditi ubuduće, na svoju odgovornost jer ima zakonskog osnova. A tamo sjedi jedan od tih pravnik i tumači to tako. Izašao sam da pojasnim, jer nije do nas kad je ovo u pitanju.“

Esad Tursunović:

„Slažem se s načelnikom da to traje osam godina, ali šta je radila Služba za tih osam godina. Nije tamo problem samo za „Trgovir“, ali garantujem da će se sto novih radnih mjesta u Stjepan Polju otvoriti. Vidite vi ljudi kako se iz sata u sat, iz dana u dan zakon mijenja kada je interes. Ne mogu shvatiti administraciju i ovo što se desio socijalni bunt, šta je uzrok. Uzrok su radna mjesta i kako vidim nije interes da se zapošljava.“

Mirza Omerdić:

„Ja hoću da se zahvalim načelniku jer je uradio veliki dio posla apropo ovog odobravanja gradnje. I sam sam u većem dijelu učestvovao u pokušaju rješavanja tih stvari. Zbilja, nakon svog tog nekakvog posla koji sam odradio misleći da će biti nekakav rezultat, izašao sam razočaran. Jer bukvalo, ako bi sve to odradili kao po zakonu, ništa. Meni je drago što je načelnik izašao i zauzeo hrabar stav u pogledu tih nekakvih stvari. Ja lično kao općinski vijećnik stojim i potpisujem ove riječi i ukoliko bude bilo kakvih zakonskih smjena i ja sam isto na tapetu i potpisujem to, jer se dešava definitivno situacija da vlasnici razmišljaju da ne otvore te investicije. Moj posao je dakle u pitanju. Ja šest mjeseci radim neke administrativne stvari, a do sada sam recimo trebao da prodam hiljadu tona lepenke. Ta firma nije socijalna ustanova i ja tu ne mogu biti, a da ne radim. Postoji veliki broj ljudi koji računaju na ta radna mjesta i stalno pitaju kad će krenuti, dokle je i slično. Izgleda da je jedini način da mi svi, i načelnik preuzmemo odgovornost, jer postoje zakonske osnove, pokrenemo razvoj naše općine i podržimo načelnikov stav i njegovu nakanu.“

Vehid Osmanović:

„Klub vijećnika SDP-a podržava Izvještaj načelnika jer je u uvodnom izlaganju neke primjedbe koje smo imali otklonio. Drugo, ja se pridružujem inicijativama ljudi Stjepan Polja jer i mi nećemo imati posla ako stane gradnja. To će zakočiti i nas, jer se mi bavimo takvom djelatnošću i ne samo nas, nego i sve one koji proizvode. I krajnje je vrijeme da mi Kantonu kažemo, ako nećete usvajati izmjene mi ćemo ga primjenjivati onakvog kakvog smo mi izglasali. A to smo uradili prije osam godina.“

Zatvorena je rasprava i Izvještaj o realizaciji Programa rada, ostvarivanju politike Općine i aktivnostima Općinskog načelnika za 2013. godinu, usvojen je jednoglasno sa 29 glasova „ZA“.

TAČKA 2:

PRIJEDLOG PLANA UPISA UČENIKA U PRVI RAZRED GIMNAZIJE „DR. MUSTAFA KAMARIĆ“ GRAČANICA U ŠKOLSKOJ 2014/2015. GODINI

Uvodno obrazloženje po ovoj tački dnevnog reda dala je direktorica Minka Kurtović:

„Evo ja sam u zahtjevu za otvaranje tačke dnevnog reda vama dostavila određene materijale. I ovom prilikom želim da se izvinim za prošli puta zbog čega niste dobili iscrpne izvještaje onog što je od strane Ministarstva upućeno prema nama i sada ću, cijeneći vaše vrijeme, dati par naznaka da bih nakon toga molila ovo vijeće i gospodina načelnika da odobri upis pet odjeljenja gimnazije u školskoj 2014/2015. godini. Prvo ste tamo imali evidentni list na osnovu kojeg ste vidjeli da Gimnazija „Dr. Mustafa Kamarić“ Gračanica u ovoj školskoj godini ima 18 odjeljenja. Dakle, prema pedagoškim standardima, ona pripada malim gimnazijama. Pedagoški standardi kažu od 16-24 odjeljenja, jesu male gimnazije. Kada je u pitanju brojnost učenika u ovoj školskoj godini svega

imamo 445 učenika, a gledajući po odjeljenjima, u četvrtim razredima imamo pet odjeljenja, u trećim šest odjeljenja, u drugim razredima imamo četiri odjeljenja i u prvim razredima imamo tri odjeljenja. Kada su u pitanju zaposleni mi trenutno imamo 46 zaposlenih, od čega je 37 nastavni kadar, a 9 je vannastavni kadar. Sve je stručno zastupljeno, sem latinskog jezika, a to sam i prošle godine objasnila na koji način to rješavamo, naravno u skladu sa zakonom. Kada je u pitanju prostor takođe zadovoljavamo uvjete za pomenuti broj upisanih odjeljenja, jer imamo deset učionica koje su specijalizovanog karakter i tri kabineta (informatika, biologija i hemija). U toku smo pokušaja formiranja još jednog kabineta informatike, s obzirom da smo na postojećih 14 kompjutera koje Gimnazija ima dobili još 10 kompjutera kao donaciju. Kada su u pitanju tabele koje sam vam dostavila smatrala sam da je dobro da imate jedan pregled i da vidite koji su trendovi i kakva je otprilike upisna politika na našem kantonu. Ja sam samo dala pregled prethodne tri godine, kako biste vidjeli sve školske godine. Vidite da ove godine 509 učenika završava devetogodišnje obrazovanje, tako da je u odnosu na prethodne godine 60 učenika više. Kada je u pitanju Gimnazija mi smo se ponovo opredijelili za pet odjeljenja.“

Obrazložila je razloge za to i dodala: „Stoga vas molim, da ako je moguće, odobrite upis pet odjeljenja. Ako ne to je najmanja šteta, ali bi bila veća šteta ako se opredijelite za manji broj odjeljenja i u tom slučaju bih morala tražiti posebno odobrenje od Ministarstva. Toliko, ako imate pitanja ja sam tu.“

U diskusiji su učestvovali:

Vehid osmanović:

„Klub vijećnika SDP-a će podržati ovu politiku upisa 5 odjeljenja, da bi održali stihiju učenika, nećemo oštetiti srednju školu je se radi o možda desetak učenika.“

Senad Selimović:

„Želim se zahvaliti direktorici Gimnazije „Dr. Mustafa Kamarić“ Gračanica, profesorici Minki Kurtović što je na vrijeme dostavila Općinskom vijeću Plan upisa učenika u I razred Gimnazije u školskoj 2014/2015. godini. Iz dostavljene dokumentacije se vidi da je nastavničko vijeće ove ustanove utvrdilo da Gimnazija raspolaže sa dobrim prostorom, mogućnostima i stručnim kadrom i potencijalom prema tome i opravdano je planirati upis 5 odjeljenja u I razred, odnosno 150 učenika u školskoj 2014/2015. godini. U odnosu na tekuću školsku godinu vidim da se planira upisati više učenika. Hvala vam svima. Vjerujte da sam sretan što otvarate svoja vrata za još učenika koji žele da se školuju i obrazuju u Gimnaziji. Direktorice, Vi i uposleni ste stvorili jako lijep i domaćinski ambijent. Zaista se osjećam prijatno i zadovoljno kad god sam bio u Gimnaziji lijep, fer i korektan odnos i sa Vaše strane i od strane svih Vaših uposlenih. Obrazovanje, red i disciplina su na jako visokom nivou. Vi ste dakaz da jedna žena može biti uspješna i da može biti uzor zajednici u kojoj živi. I na kraju, Klub vijećnika SDA podržava Plan upisa učenika u I razred Gimnazije „Dr. Mustafa Kamarić“ u Gračanici za školsku 2014/2015. godinu i zahvaljujemo se direktorici Gimnazije i svim uposlenim u Gimnaziji na naporima koje čine kako bi učenici što bolje i kvalitetnije bili obrazovani. Direktorice Vama i svim uposlenim želim puno uspjeha u budućem radu.“

Dino Dedić:

„Klub vijećnika LDS-a i Naše stranke će podržati Plan upisa i želimo da se zahvalimo direktorici Minki na dobrom i iscrpnom objašnjenju ovog plana upisa i želio bih da istaknem još, jer sam sam završio gimnaziju, jer su uglavnom oni koji završe gimnaziju završili i fakultete na državnom nivou dok ovi drugi završe i dobiju diplome nešto brže i konkuriraju ovima što su završili za četiri i više godina.“

Himzo Avdić:

„Klub BPS-a će u svakom slučaju podržati ovaj prijedlog Plana upisa učenika u I razred Gimnazije uz jedno pitanje. Da li je nastavničko vijeće tražilo sa biroa podatke koliko gimnazijalaca već ima prijavljenih na birou kao nezaposlenih?“

Edin Ibrišević:

„Želim nešto da kažem sa aspekta struke, kao magistar i bivši gimnazijalac Dobojske gimnazije, da zbilja uputim sve čestitke na rad Gimnazije i na uslove u kojima rade gimnazijalci. A najbolja potvrda toga je, da kažem, novi akademski obrazovani kadarovi koje je izvela Gračanička gimnazija. Gračanička gimnazija je, rasadnik tako da kažem, novih intelektualaca i u svakom slučaju treba podržati ovaj plan upisa sa većim brojem odjeljenja u Gimnaziji.“

Na pitanje Avdić Himze, odgovor je dala direktorica Minka Kurtović i zahvalila se vijećnicima na podršci i komplimentima, nakon čega je prijedlog Plana upisa učenika u I razred Gimnazije „Dr. Mustafa Kamarić“ Gračanica u školskoj 2014/2015. godini, usvojen jednoglasno sa 30 glasova „ZA“.

Na zahtjev Kluba vijećnika BPS-a data je pauza u trajanju od 10 minuta.

TAČKA 3:

IZVJEŠTAJ O IZVRŠENIM PROCJENAMA PROMETA NEPOKRETNOSTI I PRAVA ZA 2013. GODINU

Nije bilo dodatnog obrazloženja od strane predlagača, a za diskusiju po ovoj tački dnevnog reda javio se Gadžić Rahim:

„Ja sam izašao da pohvalim rad komisije iz razloga što vidimo da je komisija uradila sve predmete. Ukupno su imali zahtjeva 477, riješeno 472, a ostali nisu jer su dospjeli 30. ili 31. 12. 2013. godine. Iz toga vidimo da su 464 zahtjeva bez žalbi riješena, samo 6 zahtjeva je ponovno rješavano. Tri su zahtjeva odbijena, 2 su djelimično usvojena, a jedan je zahtjev uvažen. Ta komisija je radila za naknadu od 3,00 KM, znači treba izaći na teren, izvršiti procjenu i sastaviti zapisnik i sve to, i ja im čestitam na izvrsnom radu i nadam se da će i dalje nastaviti s uspjesima u svom radu.“

Izveštaj o izvršenim procjenama prometa nepokretnosti i prava za 2013. godinu, je usvojen jednoglasno sa 30 glasova „ZA“.

TAČKA 4:

INFORMACIJA O STANJU ZAŠTITE OD POŽARA I VATROGASTVA, PRAĆENJU I IZVRŠENJU PLANA ZAŠTITE OD POŽARA NA PODRUČJU OPĆINE GRAČANICA U 2013. GODINI

Nije bilo dodatno obrazloženja od strane šefa Službe za civilnu zaštitu.

Učesnici u diskusiji su:

Fadil Mešić:

„Ja bih imao par sugestija šefu Službe gosp. Mustafi Bajiću. Profesionalna vatrogasna jedinica kako ste naveli ima ukupno 7 vozila. Starost vozila je trideset godina. Broj zaposlenih je 13, a treba oko 20 ljudi. Gospodine Bajiću, Zakon o šumama TK glasi: Vlasnici imovine su dužni organizovati zaštitu od požara u skladu sa Zakonom. Da li je po tvom saznanju profesionalna vatrogasna jedinica Gračanica ikad fakturisala Šumama TK troškove? Zatim, ponovo ste u svojoj informaciji naznačili hidrantske instalacije koje su veliki probelm u seoskim područjima. Kod izgradnje vodovoda o ovom slučaju se nije vodilo računa, ali nije kasno ni sada da se uradi. Gospodine načelnice, treba planirati u idućoj godini finansijska sredstva kad je u pitanju nabavka jedne cisterne kapaciteta oko 10.000 litara. Imao bih i jedno pitanje Mustafi Bajiću. Recimo ako dva vatrogasca dežuraju u službenim prostorijama jedinice i sa terena stigne poziv za intervenciju, je li u tom trenutku zgrada ostaje prazna. A desi se u sušnim periodima i kod visokih temperatura, zatim još jedan poziv, ko prima poziva u tom slučaju i da li je ovaj broj 13 ljudi dovoljan? Toliko.“

Esma Pašić:

„Klub SDA je na redovnom sastanku Kluba vijećnika razmatrao Informciju o stanju zaštite od požara i varogastva, praćenju i izvršenju Plana zaštite od požara na području općine Gračanica u 2013. godini, istu je prihvatio, ali tražimo od šefa Službe gosp. Mustafe Bajića da nam da informaciju šta je poduzeo po pitanju realizacije zaključaka sa prethodnog izvještaja, a vezano je za postavljanje hidrantske mreže u svim mjesnim zajednicama? Naime, dešava se da dođe do požara u nekim mjesnim zajednicama posebno koje su više udaljene i dok vatrogasna služba stigne na određite bude kasno. Iz tog razloga tražimo informaciju o hidrantskim mrežama u svim mjesnim zajednicama, uzevši u obzir da usljed nastanka požara ne samo da stradaju materijalna dobra i ostalo nego i ljudski životi. Iskoristit ću ovu priliku da čestitam Mustafi Bajiću na ovoj informaciji na ovom trudu kojeg ulažu bez obzira na nedostatak finansijskih sredstava, opreme itd. i pročitat ću ovaj jedan zaključak koji kaže:

- Podizanjem svijesti o potrebi unapređenja ove oblasti, opremanjem profesionalne općinske jedinice i obukom zaposlenih i stanovništva, stvorit će se pretpostavke za efikasniju organizaciju zaštite od požara, odnosno smanjiti stepen ugroženosti od požara ljudi i materijalnih dobara.“

Osman Sulejmanović:

„Klub SDP-a je razmatrao ovu informaciju i podržava je, s tim da se pokuša iznaći mogućnost oko nabavke ovih osnovnih sredstava.“

Odgovore na postavljena pitanja i sugestije dao je Bajić Mustafa, šef Službe civilne zaštite:

„Vezano za zaštitu od požara na šumama, tačno je to da je Zakonom o zaštiti od požara i vatrogastvu propisano da je odgovornost za zaštitu od požara na Šumama, i na šumskom i poljoprivrednom zemljištu u nadležnosti pravnih i fizičkih lica koji su vlasnici ili korisnici šuma, šumskog ili poljoprivrednog zemljišta kao i organi uprave Federacije, Kantona, grada i Općine koji su nadležni za šume i šumsko zemljište. Znači u ovom slučaju glavna djelatnost zaštite šuma od požara je na preduzećima, odnosno pravnim i fizičkim licima koji upravljaju šumama. Tačno je to da se dešava da prije tih odgovornih lica uglavnom intervenišu vatrogasne jedinice, na poziv građana. Oni po tom pozivu izlaze i gase, bez obzira da li se radi o šumi, šikari ili nekoj drugoj imovini građana. Mi smo imali problema, određenih problema sa Šumama TK i jednom prilikom smo dogovorili sastanak i održali ga, gdje se oni nisu oglašavali na naše zahtjeve, odnosno za fakturisanje tih usluga koje smo mi izvršavali. Međutim, 2012. godine su već počeli izvršavati svoje obaveze na one fakture koje su upućene od strane Općine. Ove godine nisu imali požara na šumama, nego samo požara koji su izazvani na parcelama koji su se proširili na poljoprivredno zemljište i na šume, tako da je u tom dijelu i djelovala vatrogasna jedinica. Znači u 2013. godini nije bilo ništa fakturirano prema Šumama TK što se tiče hidrantske mreže, kada smo usvojili Plan zaštite od požara za područje općine Gračanica, kazali smo ko je odgovoran za hidrantsku mrežu. Znači javno preduzeće i drugo pravno lice koje upravlja vodovodom i hidrantskom mrežom dužno je pri izgradnji i konstrukciji korištenja ovih mreža i propisan protočni kapacitet i pritisak vode u hidrantskoj mreži, odnosno vodovodne mreže za potrebe gašenja požara. Znači javna preduzeća i druga pravna lica dužna su stalno održavati u ispravnom stanju hidrantsku mrežu o čemu vode odgovarajuću evidenciju i o tome izvještavaju nadležnu profesionalnu vatrogasnu jedinicu. Zakon o zaštiti od požara je decidno propisao ko je obavezan za izgradnju i za održavanje hidrantske mreže. Ne može se prebacivati da je to nadležnost vatrogasne jedinice. Ona samo koristi u onom dijelu kad se ukaže potreba da se koristi ta voda. Ovdje su najodgovorniji vlasnici tih objekata, tih prostora itd. Što se tiče dežurstva, tačno je da u vatrogasnoj jedinici budu i po dvojica. Međutim, uređeno je, dogovoreno i propisano da se u vrijeme kada dežuraju dvojica, znači postoji stanje pripravnosti gdje se pozivaju drugi uposlenici koji dolaze i održavaju dežurstvo u Vatrogasnom domu, odnosno u slučaju potrebe pozivaju pomoć i drugih vatrogasaca. I u ovom izvještaju mi smo prikazali i broj vanrednih sati gdje su uposlenici vatrogasne jedinice bili angažovani na zaštiti od požara.“

Hasan Puškar:

„Prvo 2013. godine smo mi ovdje usvojili Plan, to jest Zakon o zaštiti od požara, odnosno Plan smo uskladili sa Zakonom. Mi smo tad odgovornost prebacili, a ja sam ovo isto ponavljao, a

nas ovdje 30 ispadamo da ne kažem šta, samo dižemo ruke i usvajamo, a u 90% ne razmišljamo o onom za šta dižemo ruke. Tad smo direktno prebacili odgovornost, evo vidite, na pravna lica, u svome krugu firme su dužne održavati hidrantske mreže. Po meni znači Šume TK ili poslovna jedinica iz Gračanice je dužna dovesti hidrantsku mrežu bar blizu svog posjeda u Skipovcu. I direktno smo prebacili odgovornost na Općinu Gračanica, odnosno MZ-e da mi odgovaramo po zakonu. Znači da se desi požar u Sokolu, nema izgrađene hidrantske mreže, čovjek ode na sud, tuži nas, po zakonu smo mi krivi što nema hidrantske mreže u Sokolu, a imamo vodu. Ovdje su izuzete samo dvije MZ-e, Škahovica i Babići čini mi se, jer nemaju dovoljno vode. Samo ja na ovo isto upozoravam, sve je dobro dok neko nekog ne tuži. Tad se traži odgovornost, a evo neka ovdje izađe neko ko je dobio dvjesto, tristo hiljada za izgradnju vodovodne mreže u MZ-i, jer u gradu Vodovod vodi brigu o tome, jer su oni pravno lice i neka neko taj kaže ko je izgradio hidrantsku mrežu u naselju gdje je dobio državne pare za svoju MZ-u. Projektom je, odgovorno tvrdim, bila predviđena hidrantska mreža i u svakom projektu ima predviđeno. Neka izađe ko je to postavio. A drugo pitanje, godinu dana je prošlo, trinaest mjeseci nije niko iz profesionalne vatrogasne jedinice došao da pita je li u Sokolu ima hidrant i gdje je ključ i mogu li dobiti ključ od hidranta, što ja smatram da je njihova dužnost i obaveza da znaju gdje su hidranti. Da sad ne navodim primjer kad je u nas gorio mlin, hidrant 100 metara od njih, a oni idu u Gračanicu i sipaju vodu. To je van svake pameti. Ovo bih potencirao prema načelniku. Općina daje novac u svakom prjektu 100% ima hidrantska mreža ili hidrant. Pa evo neka se kaže, a trebalo bi da u svakom naselju ima hidrant, a milioni maraka su u vodosnabdijevanje potrošeni, a mi smo dužni to po zakonu imati. Molio bih nadležnu službu civilne zaštite, Općinu i MZ-e da pristupimo ozbiljno rješavanju problema, a ne da stoji, bit će, vidjet ćemo, nego jesmo, tad smo, hajde da radimo. A to je svima nama u interesu, a ne da čekamo da se nešto desi pa onda da djelujemo. Mi smo direktno, nas trideset odgovorni a ne da dižemo samo ruku. Ogromna sredstva su data, a nema hidrantske mreže. To su sitne pare i dajte da pristupimo rješavanju tog problema. Po jednom to je nekih 1.000,00 KM. To nije ništa.“

Odgovor je dao Mustafa Bajić:

„Evo ja moram cijenjenom vijećniku opet ponoviti. Bilo bi dobro Zakon o zaštiti od požara i vatrogastva da se pročita. I na početku ovog zakona piše, i ja sam u prvom uvodnom dijelu kazao ko je odgovoran. Kaže, vlasnik, odnosno korisnik imovine kad se radi o privatnom vlasništvu, rukovodilac organa uprave, upravne organizacije i drugog državnog organa Federacije, Kantona, grada i Općine, direktor, odnosno drugo odgovorno lice u privrednom društvu i drugom pravnom licu određenog aktom pravnog lica. Znači svi smo mi odgovorni za svoju imovinu. Kažete kad se projektuje vodovodna mreža. To je zakonom propisano da se uradi hidrantska mreža. A zašto nije urađena, to opet treba pitati nekog drugog. Ponovo sam naglasio članom 49. kaže, javno preduzeće ili drugo pravno lice koje upravlja vodovodom i hidrantskom mrežom dužno je pri izgradnji, rekonstrukciji i korištenju ovih mreža osigurati propisan protočni kapacitet i pritisak vode u hidrantskoj, odnosno vodovodnoj mreži za potrebe gašenja požara. Javna preduzeća ili druga pravna lica dužna su stalno održavati u ispravnom stanju hidrantsku mrežu o čemu se vode odgovarajuće evidencije i o tome izvještavaju nadležnu profesionalnu vatrogasnu jedinicu. Isto je propisano i za zgrade stambene. Ne možemo mi graditi hidrantsku mrežu, neke stvari smo uradili i to blagovremeno, a to što nema u MZ-a hidrantske mreže to moramo uraditi svi i svima nam to pomaže.“

Hasan Puškar:

„Ja bih zamolio i ove što hvale da se uključe u diskusiju, a ne samo da Hasan evo dvije godine izlazi i kritikuje pa ispadnem neki, da ne kažem šta. Ja kažem jedno, sva pravna lica prilikom prijema objekta ustvari, da li pri izdavanju upotrebne dozvole, došao je protivpožarni inspektor i nema ništa od dokumentacije dok ne uradi sve po PS-u. Ja tvrdim da su pravna lica u 90% slučajeva ispravna. Znači moraju imati, ali ja opet tvrdim budžet i budžetske pare koje mi ulažemo su drugo. Ne mogu ja ići u Piskavicu i govoriti de ti napravi hidrantsku mrežu. Znači neko mora odnekle krenuti. Ili je to od Civilne zaštite ili vatrogasaca. Ja evo pokrećem, po ko zna koji put, inicijativu da tu treba postupiti po rješavanju tog problema. Znam i sjećam se u onom zakonu stoji da su Šume TK dužne vodoobskrbne objekte izgraditi, prirodne brane napraviti u šumama. Jesu li napravili. Je li u Četovulji ima vodoobskrbna brana ili nešto slično i je li njima iko nakon

izlaska sugerisao da su dužni i ako neće da se prijave inspektor. Ali će prijaviti firme, pravna lica inspekciji ako nije postavio. Da se pokreće znači inicijativa da se krene u realizaciju ovog jer smo po zakonu dužni. Po meni treba Civilna zaštita ili vatrogasna jedinica da se uključi sa nekim i kaže kako to uraditi.“

Vehid Osmanović:

„Evo ja bih se uključio u ovu diskusiju potpuno podržavajući Hasana Puškara. Evo i mi imamo projekat vodosnabdijevanja u Gornjoj Orahovici u kome je definisan hidrant. Ali nismo mi izgradili iz razloga što uvijek nema sredstava u budžetu. Hajde da za naredni budžet sagledamo situaciju u svim MZ-a i tamo gdje ima dovoljno vode i gdje ima projekat da se treba uraditi pa da to predvidimo u narednom budžetu. Jer ni jedna MZ-a nema vlastitih sredstava da napravi sve te hidrante. Slažem se znači da Civilna zaštita u saradnji sa općinskim službama do narednog nacrta budžeta sagleda situaciju i predloži. Naš projekat je ovdje u Općini i tamo piše koliko košta. Zaista bi trebali ovo pokrenuti, a i zakonom je to obaveza, koji je na snazi i da se ide u izgradnju te hidrantske mreže tamo gdje je moguće. Tamo gdje nije moguće, sačekat ćemo da se prvo riješi problem vodosnabdijevanja.“

Općinski načelnik, Nusret Helić:

„Evo samo da predložim. Uvažavajući diskusije i Hasana i svega ovoga, dakle da služba nadležna pripremi Plan izgradnje hidrantske mreže i kojeg treba da razmotri ovo vijeće. Radi se o pravnim subjektima ili MZ-a koje su naslonjene na budžet i nemaju sredstava i na taj način u to krenuti. Neće biti lako odjednom to sve raditi, ali prema tom planu da bude jedan od zaključaka Plan izgradnje hidrantske mreže u kojem ćemo vidjeti gdje sve treba, koliko to košta i u kom periodu i iz kojih sredstava možemo nabaviti. Dakle, svim tim pitanjima ovako treba pristupiti, jer što kažu, ozbiljna su vremena i svi mi se učimo i hvala Bogu da se nisu desile neke veće nesreće i štete.“

Predsjedavajući Vijeća je definisao zaključak koji glasi:

Usvaja se Informacija o stanju zaštite od požara i vatrogastva, praćenju i izvršenju Plana zaštite od požara na području općine Gračanica u 2013. godini, uz stav:

- da Služba za civilnu zaštitu izradi Plan izgradnje hidrantske mreže u svim mjesnim zajednicama na području općine Gračanica, u kojima je riješeno pitanje i problem vodosnabdijevanja, sa finansijskim pokazateljima kako bi se u narednom periodu planski gradili hidranti.

Jednoglasno se prihvata Informacija o stanju zaštite od požara i vatrogastva, praćenju i izvršenju Plana zaštite od požara na području općine Gračanica u 2013. godini i Zaključak sa 29 glasova „ZA“.

TAČKA 5

INFORMACIJA O REALIZACIJI ODLUKE O STIPENDIRANJU UČENIKA I STUDENATA U ŠKOLSKOJ 2013/2014. GODINI

Nije bilo dodatnog obrazloženja predlagača. U diskusiji su učestvovali:

Dino Dedić:

„Ja bih imao samo jedno pitanje. Možda nisam u pravu ali da mi pojasnite. Kad gledamo ovamo kategoriju učenici i studenti u deficitarnom zanimanju. Prvi student, student prve godine građevinski fakultet, na listi prvi Ahmetović Fikret dobio je stipendiju. Zanima me samo dole dalje takođe je građevinski fakultet, Tahirović Safera Zana i na trinaestom je mjestu, a ovih faktički jedanaest nisu dobili. Interesuje me kako to i koja su to pravila jer ovdje nisu objašnjena.“

Almedin Devedžić:

„Služba za upravu, društvene djelatnosti, boračko-invalidsku zaštitu i zajedničke poslove je pripremila ovu informaciju. SDA razmatrajući ovu tačku dnevnog reda je prihvatila ovu informaciju smatrajući je u ovom trenutku za dobru i sveobuhvatnu sa određenim napomenama. Obzirom da su najvećim dijelom obuhvaćene sve ove kategorije po kriterijima, smatramo da bi trebalo, gospodine

načelnice, prilikom pripreme budžeta za iduću godinu da pokušemo povećati broj stipendija. Možda evo i iz dijela paušala i drugog, s obzirom da je naša općina rasadnik talenata i dobrih učenika, a iz mnogih razloga nisu u mogućnosti da se dalje školuju, što bi većim brojem stipendija omogućili većem broju onih koji žele da se školuju.“

Odgovor na postavljeno pitanje dala je Šaković Senaida, šef Službe za upravu.

Rahim Gadžić:

„Almedin Devedžić je zaboravio jednu stvar da kaže. Klub SDA predlaže i da se usvoji predloženi zaključak iz Informacije, a to je da se obezbijedi dodatnih 1.800,00 KM kako bi stipendiju dobili svi učenici i studenti koji imaju isti broj bodova, ali zbog utvrđenog broja stipendija nisu to ostvarili. Molio bih predsjedavajućeg da taj zaključak da na izjašnjavanje.“

Predsjedavajući Vijeća, Edin Ibrišević je predložio zaključak koji glasi:

Usvaja se Informacija o realizaciji Odluke o stipendiranju učenika i studenata u školskoj 2013/2014. godini, uz stav:

- da se iz budžeta za 2014. godinu izdvoji 1.800,00 KM i dodijeli stipendija svim učenicima i studentima koji imaju isti broj bodova kao i posljednji kandidat u okviru utvrđenog broja stipendija.

Zaključak je usvojen jednoglasno.

TAČKA 6:

NACRT ZAKONA O ZAŠTITI OD BUKE

Predsjedavajući Općinskog vijeća je članove Općinskog vijeća zamolio da na nacrt Zakona o zaštiti od buke do ponedjeljka dostave primjedbe i prijedloge ukoliko ih imaju, kako bi Stručna služba iste uputila nadležnom ministarstvu TK.

TAČKA 7:

ZAKLJUČAK IMOVINSKO-PRAVNE SLUŽBE

U materijalu za sjednicu vijećnici su dobili zaključak Imovinsko-pravne službe ali se u međuvremenu pojavio i prijedlog rješenja od strane Službe na zahtjev građanina tako da je ova tačka dopunjena sa tim rješenjem. Rješenje je razmatrala Komisija za propise i Statut i isto prihvatila.

Zaključak je usvojen jednoglasno.

Rješenje o preuzmanju je takođe usvojeno jednoglasno.

Na kraju sjednice Vijeća prisutnima se obratio predsjedavajući Općinskog vijeća Gračanica Edin Ibrišević i uputio čestitku za nastupajući praznik 1. mart Dan nezavisnosti BiH kao i svim građanima.

Vijeću su se obratili i predsjednici klubava Vehid Osmanović, Himzo Avdić, Rahim Gadžić i Dino Dedić, takođe čestitajući svima 1. mart Dan nezavisnosti BiH, te 8. mart Dan žena.

Na kraju se Vijeću i građanima sa čestitkama obratio i Općinski načelnik.

Sjednica je završena 12.45 sati.

Zapisnik vodila: Mevlida Naimkadić

Tonski snimak sjednice uredno je arhiviran.

Mevlida Naimkadić

PREDSJEDAVAJUĆI
OPĆINSKOG VIJEĆA

mr.sci. Edin Ibrišević